

## Introducziun

Ella votaziun dil pievel (catolic) dils 4 d'october 1959 ei la constituziun dalla Baselgia catolica dil Grischun vegnida acceptada. Sin quei fundament ed enteifer quella rama han il Corpus catholicum sco l'autorità legislativa suprema dalla Baselgia cantunala e la Cumissiun administrativa sco l'executiva relaschau ordinaziuns giuridicas ed administrativas, denter auter davart l'organisaziun, la surveglonza e las finanzas dalla Baselgia cantunala sco era da niev davart il dretg dallas pleivs d'eleger il plevon.

Suenter ussa pli che 20 onns semuossa il basegns, da resumar e publicar las normas vertentas, cuntenidas en plirs decrets en ina collecziun da leschas. Tuts decrets legals vegnan publicai els treis lungatgs cantunals. Decisiva ei denton la versiun tudestga, sco quella ei vegnida tractada e delucidada el Corpus catholicum. Mintga mappa cun las leschas cuntegn la constituziun e las ordinaziuns sin tudestg, talian e romontsch. Ils texts dallas leschas corrispundan al stan digl 1 da fenadur 1980. Suenter mintga revisiun d'in dils decrets publicai ni da singulas prescripziuns da tals sco era el cass, che novas ordinaziuns generalas vegnan relaschadas, vegn la collecziun da leschas accumulada.

Ell'aschunta vegnan ils decrets impurtonts per las Baselgias cantunals ord las leschas dil Cantun publicadas, aschia art. 11 dalla constituziun cantunala, il qual munta la basa costituziunala dallas duas Baselgias cantunals, e la lescha cantunala davart l'imposiziun d'ina taglia da cultus allas persunas giuridicas.

Nossa constituziun cantunala renconuscha las duas Baselgias cantunals cun lur pleivs sco corporaziuns religiusas publicas. Quellas normeschan lur relaziuns internas ed administreschan lur facultad independentamein. Ellas han era il dretg d'imponer taglias. – Pia, baselgia libra el stadi liber.

Nus constatein cun satisfacziun, che la collaboraziun cun las aultas autoritads cantunals, cun gl'Ordinariat episcopal e cun ils organs partenaris dalla Baselgia evangelica ei adina buna.

La Cumissiun administrativa vul perseguitar sia finamira e siu duer, ch'ei buca semidai, vinavon e crear e mantener las premissas economicas e finanzialas, per che la Baselgia sappi ademplir adina irreproschablamein sia missiun religiusa, sociala e culturala.

Cuera, ils 15 d'uost 1980

Per la Cumissiun administrativa

Il president:  
*dr. Ettore Tenchio*

Igl actuar:  
*dr. Giusep Nay*